



歲功典第五十六卷

季夏部雜錄

詩經小雅出車章黍稷方華大新安胡氏曰王氏云黍稷方華季夏時也

六月章六月棲棲戎車既飭朱注六月建未之月也

維此六月既成我服朱注戎服也

尙書大傳季夏可以大赦罪人

詩含神霧曹地處季夏之位土地勁急音中徵其聲清以急

內經備化之紀氣協天休其應長夏注

所謂長夏者六月也土生於火長在夏中既長而王故云長

夏

火鬱之發炎火行大暑至山澤燔燎材木流津廣廈騰煙土浮霜鹵止水迺滅蔓草焦黃

敦阜之紀是爲廣化厚德清靜順長以盈至陰內實物化充成煙埃朦鬱見於厚土其穀稷麻其畜牛犬其果棗李其色黔元蒼其味甘鹹酸其象長夏

中央生濕濕生土土生甘甘在天爲濕在地爲土

注

六月四陽二陰合蒸以生濕氣蒸腐萬物成土

也霧露雲雨濕之用也安靜稼穡土之德也

素問風論篇以季夏戊己傷於風者爲脾風

四時刺逆從論篇長夏者經絡皆盛內溢肌膚

鄒子季夏取桑柘之火

史記武帝本紀所謂寒門者谷口也

注

谷中山之谷口漢時爲縣今呼爲冶谷去甘泉八十里盛夏

凜然故曰寒門

天官書叶洽歲歲陰在未星居申以六月與觜觸參晨出曰長列昭昭有光利行兵其失次有應見

箕

謹候曆斗之會以定填星之位曰中央土主季夏

漢書律歷志六月坤之初六陰氣受任於太陽繼養化柔萬物生長楸之於未令種剛强大故林鍾

爲地統

天文志填星曰中央季夏土信也思心也仁義禮智以信爲主貌言視聽以心爲正故四星皆失填星迺爲之動填星所居國吉

五行志盛夏日長暑以養物政弛緩故其罰常輿也

魏相傳中央之神黃帝乘坤艮執繩司下土

賈誼新書懸弧之禮義中央之弧以桑桑者中央之木也

種植書甜瓜有綠有黃小暑後方熟卽邵平所種五色子母瓜也

春秋繁露五行五事篇夏至之後大暑隆萬物茂育懷任於時寒爲賊故王者輔之以賞賜之事神異經南方蛟翼下有小蜚蟲焉旣細且小曰細蟻此蟲常春生以季夏藏於鹿耳中名嬰蜋後漢書郡國志注南中志朱提縣西南二里有堂狼山多毒草盛夏之月飛鳥過之不能得去白虎通五行篇六月律謂之林鍾何林者衆也言萬物成熟種類衆多

論衡龍虛篇盛夏之時雷電擊折破樹木發壞室屋俗謂天取龍謂龍藏於樹木之中匿於屋室之間也雷電擊折樹木發壞室屋則龍見於外龍見雷取以升天

雷虛篇雷者太陽之激氣也盛夏之時太陽用事陰氣乘之陰陽分事則相校軫校軫則激射激射爲毒中木木折中屋屋壞

說文黍禾屬而黏者也以大暑而種故謂之黍

萑莆瑞草也堯時生於庖廚扇暑而涼

四民月令六月可種冬藍

六月可蓄瓠

大暑後六月可藏瓜

月令章句自柳三度至張十二度謂之鶉火之次小暑大暑居之周之分野

禽經注黃鳥之屬應土行以象季夏

風土記南中六月則有東南長風俗號黃雀風時海魚化爲黃雀因爲名也

抱朴子守壻篇野馬六月而後息

仙藥篇雲母但有青黃二色者名雲沙宜以季夏服之

拾遺記廣延之國去燕七萬在扶桑東其地寒盛夏之日冰厚至丈常雨青雪冰霜之色皆如紺碧  
南方草木狀薰陸香出大秦在海邊有大樹枝葉正如古松生於沙中盛夏樹膠流出沙上方採  
廣志青芋稻六月熟

五岳遊峨眉西望西域雪山夜白巘岼此浩劫積雪不消六月乃益明數千里僅咫尺間

西征記陵臺冰井有六月冰

沙州記六月二十六日發龍湫晝夜肅肅常寒不復得脫襦袴

南史陸慧曉傳何點常稱王思遠恒如懷冰暑月亦有霜氣

梁元帝與武陵王書季月煩暑流金爍石

三禮義宗南岳謂之霍霍者護也言陽氣用事盛夏之日護養萬物故以爲稱

魏書律曆志次卦六月鼎豐渙履遯

水經注臨朐縣熏冶泉水出西溪飛泉側瀨於窮坎之下水色澄明而清冷特異淵無潛石淺鏤沙  
文中有古壇參差相對後人微加功飾以爲嬉遊之處南北邃岸凌空疎木交合至若炎夏火流閒

居倦想提琴命友嬉娛永日桂櫂尋波輕林委浪琴歌既合歡情亦暢是焉棲寄實可憑衿

伊闕左壁有石銘云黃初四年六月二十四日辛巳大出水舉高四丈五尺齊此以下蓋記水之漲減也

齊民要術六月一日種白莖秋葵白莖者宜乾紫莖者乾卽黑而澀

胡蔓子熟拔去急耕令好調熟如麻地卽於六月中旱時耨耩作壟蹉子令破手散還勞令平但旱種不須耨潤此菜早種非連雨不生麥底地亦得種止須急耕調六月中無不霖望連雨生則根彊科大

種蘭香治畦下水及水散子訖水盡莖熟糞僅得葢子便止晝日箔葢夜卽去之生卽去箔常令足水六月連雨拔栽之

鋤地六月以後雖濕亦無嫌注濕鋤則地堅夏苗陰厚地不見日故雖濕亦無害矣

作黃衣法六月中取小麥淨淘訖於甕中以水浸之令醋漉出熟蒸之搥箔上敷席置麥於上攤令厚二寸許預前一日刈亂葉薄無亂葉者刈胡荽擇去雜草無令有水露氣候麥冷以胡荽覆之

凡漆器盛夏連雨土氣蒸熱什器之屬雖不經夏用六月中各須一曝使乾世人見漆器暫在日中恐其炙壞合著陰潤之地雖欲愛慎朽敗更速

永嘉記曰含簾竹筭六月生味與箭竹筭相似

夏至後二十日漚泉泉和如絲

隋書禮儀志中迎含樞紐者含容也樞機有闔闢之義紐者結也言土德之帝能含容萬物開闔有時紐結有法也

唐書吐蕃傳吐蕃地直京師西八千里國多霆電風雹積雪盛夏如中國春時山谷常冰

外臺祕要造淡豉法用黑豆二三斗六月內淘淨水浸一宿瀝乾蒸熟取出攤席上候微溫蒿覆每三日一看候黃衣上遍不可太過取曬簸淨以水拌乾濕得所以汁出指間爲準安甕中築實桑葉蓋厚三寸密封泥於日中曬七日取出曝一時又以水拌入甕如此七次再蒸過攤去火氣甕收築封卽成矣

酉陽雜俎胡椒出摩伽陀國呼爲昧履支其苗蔓生莖極柔弱葉長寸半有細條與葉齊條上結子

兩兩相對其葉晨開暮合合則裹其子於葉中子形似漢椒至芳艸六月採今作胡盤肉食皆用之  
十二辰蟲狀似蛇醫腳長色青赤肉蠱暑月時見於籬壁間俗云見者多稱意事其首倏忽更變爲  
十二辰狀

周易集解坤六二直方大不習無不利干寶曰陰氣在二六月之時自遯來也陰出地上佐陽成物  
臣道也妻道也

吳地記夏駕湖壽夢盛夏乘駕納涼之處

洽聞記日濟國西南海中有三島各相去數十里其島出黃漆似中夏漆樹彼土六月破樹腹取汁  
以漆器物若黃金其光奪目

望氣經六月三日有霧則歲大熟

宋史樂志盛德在土宮聲乃作得徵而生以商爲相若用角則刑用羽則戰故季夏土王宜禁角羽  
河渠志朔野之地深山窮谷固陰沍寒冰堅晚泮逮乎盛夏消釋方盡而沃蕩山石水帶礬腥併流  
於河故六月中旬後謂之礬山水

益部方物略記七寶花大抵玉蟬花類也擢穎挺挺盛夏則榮丹紫含英以寶見名

圖經本草黃連葉似甘菊花黃色六月結實似芹子色亦黃

獨活羌活春生苗葉如青麻六月開花作叢或黃或紫結實時葉黃者是夾石上生葉青者是土脈中生此草得風不搖無風自動故亦名獨搖草

秦艽根土黃色而相交糾枝幹高五六寸葉婆婆連莖梗俱青色如蒿莖葉六月中開花紫色似葛花當月結子

夢溪筆談六月萬物小盛故曰小吉

倦遊錄嶺南暑月白蟻入水爲蝦土人夜以火燭取製爲鮓名天蝦鮓

物類相感志凡山石盛夏必汗出赤黃者金汗白而辛者銀汗

雞林記高麗黃漆生島上六月刺取瀋色色若金日暴則乾本出百濟今號爲新羅漆

避暑錄話劉禹錫傳信方有桂漿法善造者暑月極快美

政和本草地錦草生近道田野莖葉細弱蔓延於地莖赤葉青紫色夏中茂盛六月開紅花結細實

取苗子用之

黎州圖經黎州通望縣銷樟院有娑羅綿樹三四人連手合抱方匝先生花而後生葉其花盛夏方開謝時不背而墮宛轉至地其花藥有綿謂之娑羅綿

爾雅翼射干苗高二三尺葉似蠻薑而狹長排列如翅羽故名烏嬰烏蒲烏扇花以六月開如萱草而小上有紅點人家庭砌多植以爲玩

鰕魚巨口而細鱗鬣鬣皆圓黃質黑章皮厚而肉緊特異常魚夏月盛熱時好藏石罅中人卽而取之

菊譜夏金鈴菊出西京開以六月深黃千葉甚與金萬鈴相類而花頭瘦小不甚鮮茂以生非時故也

桂梅花木志茉莉花六月六日以治魚腥水一漑益佳

朱子集問四時取火何爲季夏又取一番曰土旺於未故再取之

朱子語錄五行之有土非土則不足以載四者土於四時各寄王十八日或謂王於戊己然季夏乃

土之本宮故尤王夏末月令載中央土者以此故也

圖說五氣順布四時行焉金木水火分屬春夏秋冬土則寄旺四季如春屬木而清明後十八日卽是土寄旺之時每季寄旺十八日共七十二日惟季夏十八日土氣爲最旺故能生秋金也

武昌記楚山東有小溪盛夏時凜然常有寒氣謂之寒溪

會稽志諸花少六出者唯梔子六出會稽有二種一曰山梔生山谷中花瘦長香尤奇絕水梔生水涯花肥大倍於山梔而香差減近歲有千葉梔六月初始盛

玉海西京宮城南三門中曰長夏

蠡海集鬼神類九天生於六月二十四日者六爲陰數四六二十四老陰之策也老陰變少陽故應於雷神焉

昨夢錄猛火油出高麗東數千里日初出之時因盛夏日力烘石極熱則出液他物遇之卽爲火惟眞琉璃可貯之入水藻荇俱盡

山家清供胡麻酒盛夏飲一巨觥清風颯然絕無暑氣其法漬麻子二升煎熟略炒加生薑二兩生

龍腦葉一撮同炒細研投以煮醞五升瀘去渣水浸之大有所益

北苑茶錄山木至夜益盛故欲尊生長之氣以糝雨露之澤每歲六月興工虛其本培其末滋蔓之草遏鬱之木悉用除之此之謂開畬

捫蝨新話南中花木性皆畏寒故茉莉惟六月六日種者尤盛

通考六月初六日晴主收乾稻雨謂之湛轆耳主有秋水

山居四要種菜豆法立秋前宜刈了麻地上種太早不生角若預占豆收否當年李多不蛀則宜豆忌卯日下種

便民圖纂造七醋用六月六日以黃陳倉米五斗爲率不淘淨浸七宿每日換水一次至七日做爲熟飯乘熱入甕按平封閉勿令氣出第三日翻動至第七日開再翻轉傾入井花水三擔又封七日再攪再封至三七二十一日成好醋此法簡妙

四時類要六月掃庭除候地毒熱出麥薄攤至未時及熟收可以二年不蛀

七修類藁種蘿蔔法宜肥地撒種沙地尤效瘦地用糞作壟種帶露耙地則生蟲鋤不厭頻苗稠小

拔令稀則肥大霜降後或醃或藏窖皆可七月種遲

燕史六月六日食銀苗菜卽藕苗也

丹鉛錄朱子語錄云人謂楊億通禪學者以其有八角磨盤之句耳按北澗禪師偈云六月一日前萬象森羅替說禪六月一日後八角磨盤空裏走今朝正當六月一無位真人赤骨律金毛獅子解翻身無角鐵牛眠石室十聖三賢揔不知笑倒寒山并拾得楊億因演之曰八角磨盤空裏走金毛獅子變作狗擬欲藏身北斗中應須合掌南辰後

熙朝樂事六月六日宋時作會於顯應觀因以避暑今會廢而觀亦不存自此遊湖者多於夜間停泊湖心月飲達旦而市中敲銅盞賣冰雪者鏗聒遠近是日郡人舁猫狗浴之河中致有汨沒淤泥跟踉就斃者其取義竟不可曉也

荔枝譜食荔枝有益於人當盛夏時乘曉入林中帶露摘下浸以冷泉則殼脆肉寒色香味俱不變嚼之消如絳雪甘若醞醕沁心入脾蠲渴補髓啖可至數百顆

雪濤談叢滇省風俗每年於六月二十八日各家具束輦爲藁高七八尺凡兩樹置門首遇夜炳燎

其光燭天是日各家俱用生肉切爲膾調以醯蒜不加烹飪名曰喫生總稱曰火節問其故謂弔忠臣王禕留此記蓋禕受命入滇說元梁王降王反殺禕醢其肉若爾則炳彙可也奚忍食生爲耶夫楚人競舟弔屈子也晉人禁煙傷介推也皆有不忍之意焉王公被醢而滇俗斫膾喫生毋乃倒置乎存炳火革食生可也

餅史月表六月花盟主蓮花玉簪茉莉花客卿百合山丹山礬水木犀花使令錦葵錦燈籠長雞冠仙人掌頰桐鳳仙花

花曆六月桐花馥齒莖爲蓮茉莉來賓凌霄結鳳仙降於庭雞冠環戶

月令演六月避伏日三天貺節六薦麥瓜初碧筒勸中竹篠飲蓮誕二十

廣菌譜五木耳六月多雨時採之暴乾可烹食桑槐楮榆柳此爲五木耳

田家五行月內有西南風主生蟲損稻秋前損根可再抽苗秋後損者不復抽矣諺云秋前生蟲損一莖發一莖秋後生蟲損了一莖無了一莖

農政全書銀桃形圓色青白肉不黏核六月中熟

近峯記略文皇將靖難以六月十一日召三司府縣官出西瓜食因責以離間事執都指揮謝貴布政張昺殺之乃舉兵宸濠將謀不軌亦以六月十一日出西瓜與羣官共食執都御史孫燧副使許達殺之乃舉兵事同而義殊不度德量力也

本草綱目造大小麥麴法用大麥米或小麥連皮并水淘淨曬乾六月六日磨碎以淘麥水和作塊楮葉包紮懸風處七十日可用矣

海槎餘錄榕樹最大其陰最密幹及三人圍抱者則枝上生根綿綿垂地得土力又生枝如此數四其幹有闊至三四丈者陰覆重重六月不知暑

濟世仁術做蓮花醋法白麴一斤蓮花三朶擣細米和成團用紙包裹掛於風處一月後取出以糙米一斗水浸一宿蒸熟用水一斗釀之用紙七層密封定每層寫七日字遇七日揭去一層至四十九日然後開封篩出煎數沸收之

濟陰方土王濕氣起居宜避慎之六月濕熱尤宜節飲涼冷及居處濕寒之地

選擇曆書六月土王用事日後不宜興土工事

古今圖書集成  
安碓磴開渠穿井忌土王用事後日

野獲編時俗婦女多以六月六日沐髮謂沐之則不膩不垢

昌平山水記黍谷亦謂之寒谷山有風洞洞口風氣凜冽盛夏人不敢入

廣東新語素馨毬以挂複斗帳中雖盛夏能除炎熱枕簟爲之生涼

輝縣志白龍潭在鴨子口西南飛練灑雪恍似玉龍倒臥崖壁間噲咷鏜鏜響震岩谷乍觀者多却步不敢俯視遇盛夏雷雨交作往往有白龍見雲際

廣信府志清風峽在鉛山縣西北五里有土山洗而出石得巨礮兩崖巘崿寒氣逼人峽長五丈闊五尺在裂石間行清風透體六月如秋

### 季夏部外編

菩薩本行經佛在鬱單羅延國領千二百眾村落間時天盛熱路無陰涼一放羊人念言三界之師冒涉盛暑編草作蓋用覆佛上捉隨佛行去羊太遠放蓋擲地還趨羊邊佛告阿難此人敬心十三劫中天上世間生尊貴處竟十三劫成辟支佛名阿耨婆達